

Visoki predstavnik omogućio kantonalnim ministarstvima unutrašnjih poslova da traže akreditaciju UNMiBH u devet kantona FBiH

Visoki predstavnik Paddy Ashdown je u petak donio zakonske odredbe kojima se mijenjaju Zakoni o ministarstvima unutrašnjih poslova u devet od deset kantona FBiH. Ovim izmjenama je omogućeno ministarstvima unutrašnjih poslova Kantona od 2 do 10 da traže akreditaciju UNMiBH koja pokazuje da ispunjavaju osnovne standarde demokratskog rada policije. Kanton 1 – Unsko-sanski kanton je već usvojio ove promjene, te dobio akreditaciju 3. oktobra ove godine.

Nosioci Projekta za analizu sistema pri UNMiBH/IPTF su radili sa ministarstvima unutrašnjih poslova kantona na izradi modernijih i demokratskih operativnih standarda i procesa. To uključuje, naprimjer, adekvatan sistem dodjeljivanja činova službenicima policije, transparentne i odgovorne regulatorne procedure, kao i javni uvid u interne disciplinske mehanizme. Ove sistemske promjene, koje uglavnom utiču na organizaciju rukovođenja i struktura, će profesionalizirati i depolitizirati način na koji rade policijske snage i ojačaće integritet ovih institucija. Implementacija ovih promjena se dešavala isto vremeno sa izdavanjem certifikata pojedinačnim službenicima policije.

Visoki predstavnik je konstatirao da je postignut visok nivo saglasnosti između timova koji su rukovodili promjenama pri kantonalnim ministarstvima unutrašnjih poslova i UNMiBH/IPTF-a, i također svjestan je da su kantonalna ministarstva unutrašnjih poslova uložila mnogo vremena i truda u izradu

ovih promjena. Međutim, zbog činjenice da je redovni proces donošenja zakona na nivou kantona u zastoju od izbora održanih 5. oktobra, zakonodavni organi u ovih devet kantona nisu bili u situaciji da usvoje ove zakonske odredbe. Predstojeći prestanak mandata UNMiBH krajem ove godine, a stoga i ograničeno vrijeme za usvajanje ovih promjena, podstakli su visokog predstavnika da jučer donese ove promjene.

Policijska misija Evropske unije će nastaviti raditi na razvoju ovih standarda za profesionalizaciju rada policije.